

1 4
1555
232

232




14
1555
232

梧溪集卷第七

江陰王逢原吉

連理梅頌 有前後序

逢謝病最園閒之十有七年上春海曙巖左藻德池
水陽梅大小幹四氣合理屬形色無閒特然危立當
龍門浪石偶始見焉僉愕愕以為瑞越二月二日家
姬告誕男孫乃仲子攝所出者是日長庚宿於奎抑
逢命躔西分適符而梅也叢萼玉作花香豔景章動
暎會洽宜乎觴而頌曰



昭和
五
十
年
序

猗歟梅瑞巖壑合衆幹返大朴理屬氣強兼弱先春萼
根性孤彙感清影肱江韻皇英颺弗撓雪愈貞石丈盟
世澤涵嘉應毓陰德積裕慶續宗母吝家惟睦猶實有
仁後其蕃熟也耶

逢頌梅已竊興憶故園菜亭南紫薇木連理尤特異
先嘉會君嘗慶宴里儒陳復雷輩於亭上時逢僅有
長嗣掖從在侍陳執觴起進予曰而大母徐諱閩芳
屬未有後祝而伯父諱忠甫三歲襁負避亂兵夜仆
葑蕩數濱死有勸棄之者而大母輒涕咽良久諄語

曰既子而棄焉故殺同寧死生俱也卒脫於難晚始
得而父諱惠迨冠吏他郡月寄俸具鮭膾餘則班諸
族之貧者寒陰雪雨鄰伍有不能舉火歲率濟饘粥
而大父潛昭翁元初卒相傳好延士士數數靡怠遇
事謹敏宅心夷厚鄉稱長者而伯父至析爨也而父
義甚同胞倍與產業而姑歸而蚤喪又躬為殯埋盜
盜其丘木則愬於官仍歲謁時祭之兩甥女還往三
十年卹養如一日夫和氣致祥植物先應此豈偶然
哉座客咸躑躅盡歡醉散其所言歷歷今不忘於乎

釣游先跡愴墮夢境流滯餘喘行溘朝露莫知人世
竟奚如也雖然天理不泯世澤或未艾幼孤謂諸外

孫壯寡謂孟仲二女乃復相尋於家事捐城跡屏病

句有司迫於起藥石杖枕荒寂閒時克部敬依起取

惟爾掖等上思繼夫志下見篤於行若孝若悌大有

實茲頌聲則王氏黃灣諸靈將不在他日佳子孫是

望是慰是年壬戌三月初度日書示掖攝拊

隱憂六章時有司奉吏部符敬依令旨起取

箕舌兮房耳交燭兮東鄙顧謝病兮四三胡謠詠兮迭

萋非鵠高飛兮翼焉假蘭幽幽兮林下爛晨霞兮莫洽

潦秋清兮爰酌之筇

獸有越陸魚有跋扈居巢處穴知謹風雨辛洵臨兮丁

載周以朝以夕兮五春十秋年老癯病兮勿遣有詔人

事噂沓兮紫芝叢桂聊夷猶

茨團團兮藜葉長鏡吾知兮眉如霜車爾華兮服爾章

素履諒无咎兮貞也悔亡所未亡兮隱憂中腸

虞士不往兮招維旌魯有兩生兮沒齒無名古道悠兮

時事并疑莫稽兮拔茅征貞菊延年兮姑澹以露英

雞鳴嘒兮蒼龍上蟠鶴駕其朝兮竊謝病枕安須捷

楚人

以衣被垢蕭蕭兮雲棲簷端於乎策良被輕兮七子闕

弊之謂下白帽管寧兮亦容於野

牛山兮鴉林材充兮培深彼藪澤兮大獮禽於乎窮簷

短景兮身衰還心

震琳震澤中洞庭樂石也

震遺琳八琅音夔擊節猿應吟卻西琥謝南金樂哉幽

深

超果寺祥譽極講師頂相贊

骨聳巖厓胸含冰雪具正法眼鼓廣長舌坐斷泖峯高

清孤絕將使一華五葉之傳三草二木之喻殊途而同

歸於轍者耶

數珠銘 有序

瑪瑙數珠連瓔珞五事逢顯妣李氏諱靖真之手澤

也妣氏平居江陰時嘗諷心經暇舉是謂逢日吾有

不可諱必納之宰堵中逢謹荅曰唯命厥後倉卒去

兵難舊物多所失遺而珠儼存追惟音容之隔已三

十九年矣今年癸亥秋雲閒會伏龍山唯庵然師於

松隱禪林築報恩塔落成用藏其所書華嚴大典乃以丹髹小合置珠而附焉於乎妣氏念其忘乎重銘諸石曰

唯心淨基弗垢弗隳手澤塔是歸尚神龍護搗

真率軒銘 有序

廊人士許思敬營別業於華亭縣庠之東偏嘗懲世之狃儉失常肆奢致劇者夥矣乃慕溫國司馬公之真率也以名其軒而介台泚翟守仁氏徵予銘銘曰肉不掩豆齊相嬰脫粟布被漢臣宏日食錢萬晉何曾

後賢真率世著稱簡素易直子其承

儉德堂陶爐蓋座二銘

維蓋覆爐猶天覆仁靜翁太極動舒陽春消塵海岱巨

細念均至治馨香風氣載淳 右蓋銘

后土其載磐石其固鼎位莫寧香是用顛何敢事天存

養無素願茲墊民環堵永措 右座銘

節石銘 有後序

石有節猶婦有烈孰謂之夫也志可奪乎

東霞

東霞有郁頃雨于穀旱魃方酷曾不及霖吁嗟乎郁兮
匪霞伊旭東霞有雲頃雨于粉曾不及霧化為火雲吁
嗟乎雲兮匪霞伊昕維昕維霞孰得指兮維霜維冰我
躬履兮上樊虛涼豈無枸杞采不盈簷聊永暮齒聊永
暮齒亦曰隱死

春雪封條

春雪封條載霰載雹羣陰淫威陽邈應角予適有酒言
崇于卮匪庸解寒庸以解悲喪不知其幾周矣曰心曰
柳亂不克忖其滅兮曰狼曰狗于昔屈虞成騷成書一

時行獨曠世道俱大江荒荒源始濫觴泰山奕奕雷至
穿石彼桃彼李天穰其華松柏貞固受命孔遐雪聿除
矣青園微和君子焉同式燕以歌

題昆山顧氏耕讀所

彼瘠兮甌窶耕弗力兮薄吾收於皇兮墳典不讀無學
兮沒齒有恚蟬有綏兮蠲匡豹霧隱兮蔚章耕為養兮
學為己猶干祿者遲遲婁之濫濫兮岷嶺卑茅榎兮
深蓬關身忍潔兮沮溺道邈師兮稷顏脈望仙兮芸黃
其槁枯鷓鳴兮白雨增潦顧天窮兮竝臻矢素志兮終

抱尊有酒兮思與傾倒

風條叢鳴

風條叢鳴遵野微行十室其五父夫徂征問此何時維
春發生風鳴且止雨淖泥泥父夫遐鄙妻子從徒維時
長育人莫豈弟露始淠淠霜既凜凜幸焉冬暄虵虺迭
出遺黎幾何憂與歲畢月之盈矣虧餘一郭日之蝕矣
陽氣回薄於仁后皇曷威曷虐象犀無尤齒角其尤鳳
音悠悠麟趾脩脩聖不復起嗟誰心東周

卽事五首寄桃浦諸故知

附後序

素癡得名侯君房自享大案焦征羌莫嫌衛旌不舉筋
口簡授使多嚴光世閒堪鄙是何物糞土之英禪中虱
後園石壁倚秋林醉有髻孫旁執筆

山牀折足琴暗徽種菊不種西山薇願從漢士碑有道
夢遠秦鬼歌無衣閒園不入煙火境巨浸盡漂桃土梗
老伴惟餘臥隴雲抱晦含光體常靜

有章擲還太尉閣有版不受丞相垣南朝天子許謝病

竊長木石儀鸞園平生氣節詩千首才非元亞元遺山

劉後劉靜脩素聞魯廟鑄金人晚學程門坐泥偶雙平原

裏新得原名庶全歸他日墻銘辭大手

貴不難得富可嗟二事亦到園丁家雷王藥吏錦襜袴

野藤絡樹金銀花園丁橫筇坐梧下竊愧長年釋耕者

身膏草野身土苴語孫耨耨莫輕把

東坡楚頌存虛名止烏作亭烏涇有情枇杷換葉何

青青雪中開花來遠馨多仁多核知爾少柏樹根添鄭

元草慧海禪師識侯景華容女兒哭劉表如何太白謫

仙人竟坐夜郎唐絕徼裁詩寄與多才郎塵閒寵辱要

相忘灞橋吟興驢背上月益冰壺蘸味長

是詩五首先君子卽事寫懷鄉嘗寄桃浦諸舊友者也先君子辱諸友見知之深每一往游追從款迎惟恐後及以歿告孫宏叔遠歸厚謹先王庭與立具禮來奠而李韶九成侯性自誠洎雪域以聞二上人亦踵至焉明年冬掖走謁以謝叔遠懇懇勞問因語詩卷刊未完畢叔遠慨然倡捐重貲以聞并率諸友助之亟召鐫工俾終卷帙附識詩後不敢泯其實也不肖孤掖謹識

竹梅莊辭

有序

竹梅莊者嘉定陳敷禹文之隱所也敷曾祖洪甫號梅隱有詩名宋咸淳閒嘗次和靖處士梅花詩韻六十四首其用事造語佳者若號國平明朝北闕王奴昨夜侍東昏雪裏根盤蘇武節水邊影弔屈原身此類甚多張公汝諧其壻也由進士累官至宗學博士文行優美後進咸以竹屋先生稱之敷娶汝諧曾孫女因并竹梅用名所居江西提學楊公維禎旣爲記而逢著以辭曰

物有類感兮德亦有鄰晉維王謝兮漢維荀陳斯竹梅

兮儼若人噫直節立寒兮孤根返春尚勗兮爾後雲

夜漸短三首

夜漸短曉彌長統如五鼓天蒼涼丈人醒眠斗下霜啟
明太白參錯光周公次第朝明堂

夜漸短曉彌長五鼓二點鶴鷺行弧矢殪彼天西狼微
垣小星上煒煌仲山甫氏補袞裳

夜漸短曉彌長城烏啞啞翻曙光羣臣夙興將鷹揚頌
美吉甫孝友張周歷八百斯民康

桃浦李道元世大族承其先業隱於農圃而能會

儒尚友予過其翠筠軒居因題以詩曰

依依小桃源盤盤美林圃逸人廬幽深萬竹翠如雨驚
鳥罷遶夜太白靜瞻午雪存蔣詡節籟殷湘靈語一家
務滋德六月卻煩暑適來共觴詠況喜謝簪組籜龍斬
頭角不久會齊祖此理何致之虛心自太古

得兒掖消息

冢子官江左頻將好信歸敝衣鶉百結恩誥鳳雙飛璽
鑰封常早經筵講不違三年當省覲環珮下彤闈

擊石一首癸亥冬作 有後序

古垣黠鼠窺篝燈疎簾翫雀啄研冰奉天殿旨聽野處
擊石爲歌媪所稱孝姑周褚節彌厲插秧播穀蠻謳避
陳金寡清園種果蟲蟻餘生免湯火韓錢生長富貴家
義不再醮縲絲花葉徐竹房日蔬食隻影縫紉屏塗飾
杜曹冰蘖善自持兒作童傅身姆儀清河山嫺手摘藻
事母不欲煩兄嫂吾家髻女雙練裙孟也枿牙蒙燹氛
仲也藥種躬培耘備嘗荼蓼亦厭聞君不見縶絲貝織
勤歲貢厖吠雞鳴驚夜夢鬼車嘍嘍風雨送錦字啼痕
忍淹鳳畏途征髮雛與共目冷青紅唇交蝮嵐蛇霧蝟

腥林洞苟莫棄遺名義重時哉坤貞何乃衆君不見天
孫左降雲擾鬢霜姝月姊相高寒西王宴饗瑤池干衝
牙觸璜鏘和鸞瓊眞魚貫金桃蟠鳥使下上鋒劔翰於
乎漆室處女紆憂端猶有薄薄翠袖空谷幽居安

右擊石蓋傷歲景短迫男子多故婦女能勞而貞焉
後皆鋪連空房遠道之不失其守者或謂予老伏荒
遠無補於民生得錄數節義鬼亦足自見然尚有遺
者其一夏葉氏事姑盡孝敬翁病痿凡七載日滌簣
易席必親翁卒喪製爲強宗所奪躬再備弗較至辭

色閒終身不矜怨其二徐謝氏諱蠲素凝重當苗兵
燬掠謝從夫逃適苗遇驅辱之時里閭少艾被繫相
屬謝阻板橋遽厲聲曰橋有柱我儂趁虜可乎苗怒
殺之既而悔語衆曰彼烏涇之清濟也衆喑喑去於
乎元季淆亂若葉謝者譬服古冠珮甘碎裂於食弱
肉者側此無他世教民彝未嘗一息絕滅也遂追書
於詩左

古懷

井田廢兮民無為生逃而學老兮元教浸興千載兮廬

社晉之瘁兮賢選林下菊就穢兮蓮有芳荆軻詠託兮
古懷疇寫

石田研銘

石應兮文躔窪涵兮紫煙假吾道有年育材飯賢嘻世
斯田蘄于天

采芝辭 有後序

維北土岡兮維時金商芝叢生兮色中央莖玉紫兮霓
白裳躬露采兮奉先聖王噫鷹擊兮草霜尚父邈兮斯
文祥

予自幼至壯詩夢頗多地荒存菊本人老發梅花紅
芳飛血盡黃蝶上衣來犬眠牛斗地鯤躍鳳皇池乾
坤人鮓囊歲月鬼門關雪落蘋花盡青浮山影來簾
卷東風燕子還天清月浸淡梨花最後得草霜鴛始
擊之句今年丁卯垂七十矣八月二日己酉園北小
山濯風所見芝叢茁草閒因發笑曰靜觀世閒何者
非夢耶遂作是辭漫紀如此

瓢湖月夜舟中短歌

鷺如舟兮舟如鷺我不知乘風兮風乘我為澱飛爽兮

瓢揚漪星月倒兮相迎隨降沈寥兮金節舞空明兮文
螭澹遊忘歸兮神界天借嗟白日塵一冥兮曾孰知有
清夜

壙銘

戊辰元旦書時壽七十最閒園丁王逢門生周畿刻

驪駒山

園北小山

儀鸞水

所居張涇

首西正丘狂斐士詩旌忠孝

節義鬼幣交將相公侯禮攜家辟地兩辰已布衣疏盤
善脩己草木禽魚知姓氏昨惺惺今起起無強近親鮮
昆弟有芹薦者二三子

美瞿彥德有序

彥德名懿元故兩浙運使霆發之從曾孫也幼孤事
 叔猶父同居三十年一旦以非罪在徙中懿泣愬於
 官曰罪合坐懿叔無與官義而聽之及事白歸叔已
 病歿懿延師勗教其子里士鍾景元謂予曰運使公
 之子時習仕至潯州路總管妻張氏鍾氏前後並事
 母姑葉夫人盡孝敬懿於家門無忝矣乞歌詩美之
 詩曰
 海邦甲第連雲起時異禁殊多外徙瞿家叔氏勢蒼黃

姪動中心不能已廬殫地竭籍送官毅然代叔人具歡
 鵲鳥罷遶星月夜鴛鴦雙渡江淮寒望中溝塹或野露
 雄風獨轉金雞樹涼天移席竹林遊曉漏整鞍茅店渡
 叔氏云亡弟影孤躬親致禮師訓謨行看長大率相保
 先為歌詩歌道途

吳仲圭山水為李源復題

我生未了煙霞債見水見山心所快兵戈瀕動十年餘
 真水真山不如畫梅花道人吳仲圭斯畫乃出胸中奇
 無聲詩託有聲寫沂也笑謂非公誰沙洲吐吞石齟齬

三脊仙茅雜香杜錦繡天開靈鷲雲笙竽籟過蒼龍雨
一杖商翁自外歸方舟漁郎若相語葛藟古木苔蘚皴
形若槁立湊理春屠麻略約密映帶天莫我警老作漁
商鄰漁或釣周商避秦

趙文敏所畫唐人馬楊鐵厓魯道原二提學詩後

為桃樹浦王叔閏題

肉駿花驄真權奇彷彿出浴西瑤池細觀元是敕賜太
卿者鄧公奪取少陵哀賦詩黝雲湧身霜四蹄一目冀
北空馱駘全神勃王房駟黯雙耳尖卓昆侖低奚官玉

面如滿月豪豬鞞鞞鞋佩玦烏巾漆光袍錦鮮纓絲牽
之驄欲活云誰手貌趙松雪復書杜詩成兩絕廉夫道
原繼題品世殊荐要山人跋山人數齒六十來分甘款
段終蒿萊掩卷萬里風霾開

犁星芒 有引

予寓隱烏涇之五年得一石頗秀銳想像其狀類犁
星之芒犁參之俗呼也畢居參前尤類犁之首因復
名畢曰犁星芒云及賦詩已西溝丁稭田至遂書以
遺之詩中多用星名詩曰

太湖雲根四尺強璞然一氣孕少陽嶄峯岸壁秀而蒼
山人字曰犁星芒見之在天八穀穰旄頭夜彗星左旁
斗十三宿枵相當天層懸磬天田荒箕精吐舌舐粃糠
星芒下韜儉德堂有應斯叩如琳琅有儼斯望如圭璋
遺世特立者可方雲倚霞危山人章躬拜心顙紫府皇
庶回大東汜小康於穆皇靈時雨暘神夫服役農致祥
訓趙天放并後序

天放贖翁吾故人衣帶水隔逾十春昨寄哀歌歌動神
孤梅泣然弱柳鬢君不見鴈奴知更烏子反哺牝馬之
素日車六月驅火雲冰雪慄慄驚蟲蟲人生
紛一時百世薰蕕分贖翁今策詩家勳令我
思共石坐飯野芹

滌喬永貞氏淑而豔甲子歲六月六日倭
貞拒不絕罵刃下死趙天放嘗歌之有曰倭
民凡六百獨有婦喬死貞白至是連阿都赤代
獄會赦免沈瓏代父械而死之二家狀徵附梧
集行焉嗟乎痿人不忘起予固衰疾久屏筆研然
節孝義三者棄而不錄豈情也哉趙鎮名天放其號

云

望美人三首

望美人紅顏幾見桃花春鯉魚三十六金鱗鯤躍鵬化
天之津天津橋在河南春風一度花還好鏡中紅顏看漸老美
人當來竟不來淮煙遮斷青青草

望美人春復秋碧梧銀牀露華白吳臺越宮煙草愁黃
河不入淮泗水美人坐擁萬虎兕煉石既補西北天少
須長劔東南倚

望美人一朝又一朝霰雪漸邇旌車遙使無入楚蒼問
鼎神有鞭石梯為橋長江天使限南北況復南軍夜傳
食人言美人何可得駮牝三千皆鳳臆中有晉駟高八
尺

題括蒼趙秩可庸兩使東夷行卷

維日本啟國曰卑彌呼氏始覲桓帝朝乃冠帶理爰至
唐宋若父母撫子有元征不庭由行人匪賢或梗或通
垂八十年明君作遠用柔表降貢違厥臣僕羞君其韜
威秩是謀再詔秩往僧勒闡等十僧同舟鼓鏡轟震龍伏湫
電暎香霧浮彌月說法飛梅陬名王恭迎駕象駟

仰策天駟驪仁義漢節詩書吳鉤掠耽羅觀毛人
桑駐流求陽舒陰翕上德意冒嵐衝濤百艱勸繡
紫貝闕驪珠呈春白玉陞收名汗竹光汴裔折

馬竝轡

三首時歲癸亥上春

有序

有逢謝病將省先隴而作也洪武辛酉夏
大寧縣丞蔣會以逢文學疏聞於上既
怔淋攣跛更輟互發幼子拊屢訴有司
弗見而遣行迫甚乃十二月朔京師大

雪時長子掖承乏通事司令從百官侍閒奏蒙特恩
命吏部符止之符下闔境耆艾慶忭曰山人歸其遂
乎逢性礦野寒宗微跡竊已略具內兄李四葡萄圖
詠版行舊矣姑記去鄉兵垂三十霜僑烏涇亦十有
七暑太尉張公開幕省僚之拔浙相達公蕭山之板
迨今松守林公慶王公貞葉公茂薦辟竝辭逢念夙
佩大母徐氏慈誨先君庫使嚴訓學麤自立素貧承
祀遺囑炯炯在心況諸墓久榛女兄張婦葬淺客土
鷹仁狐首途暮愧并扶僊西向理勢不得緩耳序以

陳情詞以紀別詞曰

鴻冥飛兮天遺烏號寒兮孝是思長缺何所利兮蒯緱
 歌客曾不若鈍雷兮荷老隴陌席辭於珍佩隱於玳大
 江羣山釋然歸身孩尚知愛庶子及薦新兮
 世故增畢兮家難纏微老既戒得兮病盍賦歸乃裹藥
 兮囊衣霜露備極兮梅柳具輝夢維何兮吉兆隴青青
 兮鬱金草帆神風兮醪糗香飛九峯兮湧三泖歸遂兮
 信美中報兮且喜無碑兮麗牲有錢兮剪紙日下臨兮
 春再班影孤鷗兮橫灣諒先業兮可復將天梯兮絕攀

短謠畱王公上海有序

公名瑛字子華魯人也由安豐縣學訓師來為上海
 逾年以微罪去而處約一如在官時嚴冬淮已冰父
 老咸欲公待春水生歸里乃便予父老中謝病者也
 又忝同姓因撫實成短謠託門生張敘轉投之幸聽
 而畱焉蓋公之能仕也安己以貧能退也致民盡禮
 斯二者之善將使謝令輩知所愧倣矣乎謠曰
 龍集作噩月建子更十為縣一歸里淮冰膠舟雪埋軌
 公無遽行遲春水

覽吳氏二賢母傳誌 有序

永嘉吳孝子荃母林廉氏年二十二懷妊其夫方病
革嘗指顧其腹既亡一月生荃又閱月大父亦歿大
母胡節氏率林斂葬如禮共誓保遺孤時至正末凶
魁謀不利於荃欲劫致林林昇姑與荃遁遂免荃稍
長就學躬織績以資師贄不幸林又卒胡益飭之力
由是荃鴻漸豹蔚粲縉里術孤宗緒業賴以弗隳於
乎吳氏貞萃一門慶衍冲子富貴肇憂患之極天豈
遠人乎哉荃今拜監察御史既錄傳誌介友人章瑱

致書於逢因綴其槩系以詩曰

有身當化延陵土有血不衅將軍鼓夜黑昇姑衝猛虎
教兒從胎哺從乳兒甫勝衣事書帙阿婆阿婆相喪失
紫鸞話賜屬此時金魚杖擊悲無日草庶猶存報苔心
柏孤善寶昂藏質重闡北堂聞欵欵小雨繁霜動悽怵
歲甲子春正月吉煙霞老臥田巖疾誌連郇雲墮圭華
君不見天魔舞隊元末時事酣七盤海內盡戴琉璃冠宋末時事
人情本常世道變之二賢母先瑞岑於乎泰山巖巖石
可刊三遷永銘孝者肝

半古歌

烏涇婦女攻紡績木縣布經三百尺一身主宰心窩低
十口勤勞指頭直邇來錐刀事苛刻直處難行低不得
狐狼梟獍躬踐跡舜典臯謨供戲劇君不見王伯夷狄
禽獸主腐儒作歌歌半古

趙量遠年七十五縣舉學諭夜酌閒園口號以贈
丁寬韋編久在攜趙德校牒殊遲遲揚雄草元僅覆瓿
匡鼎說詩徒解頤漫漫夜迨天罩野且罄燈前椰子簞
明年朝正彤闈下開國承家慎陳寫

次韻信道元長老菱溪草堂見寄之作 有後序

石橋方廣多可稱中有萬歲之紫藤雲深幽磬響或作
溪面落花香欲凝下方豐蔀金碧氣老禪跏趺蒼翠層
天柱家山甚峻爽杖錫讓爾今先登

道元少與茅山道士張伯雨前進士會稽楊廉夫齊
名嘗有西湖竹枝詞云湖西日腳欲沒山湖東新月
牙梳彎南北兩峯船裏看卻比阿儂雙髻鬢至今爲
絕唱或者病其浮薄廉夫謂曰金沙灘頭菩薩亦隨
世作戲或者釋焉誠演二公與道元同字皆博學負

重名而道元戾契度世僅住小山林而已今年八十
餘託友生錢岐以詩見寄且囑曰幸致敬席帽翁予
不久天柱家山去也於乎台鴈山天柱豈特道元林
龕在耶

丁卯冬季卽事

庭樹禽翻雞唱初
鉦笛錢罄老饕廚
冰壺不忝元修菜
箸葉何慚丙穴魚
一綫漫長迷五色
寸陰眞足助三餘
暖隨水霧先春發
寒併冰山與歲除

立夏日書

孟夏四月朔薰風當午時
諸陽老益壯一氣轉何遲
錦帶花裊裊黃精實纍纍
清陰覆盤石無意坐彈碁

病中述懷

終老甘農圃煙蔬帶豆田
無官天曲宥有徑世秀緣暖
趁茅茨日寒知竹柏年私
懷復何嫌吾道不無傳

壽亭成

疊益浮春釀親朋慶壽亭
麻衰萬石長襪帽小城丁
易卦懲同吝騷詞託獨醒
三郎市諸藥魚菜附歸舫

題管夫人畫蘭

趙管才亭柳絮風水晶宮裏寫幽叢秋來初作夫君佩

天、回文漫自工

一香圖

生鴛被拆寒霜英雄自伐蛾眉斧

興夜未闌一出客卿成底事

聯句附

生遵儉德中歲謝勞謙

塗盛車轍不是學陶潛

甘同燥餉道疲牛馬

柴車

賢聚德星高一水圍精舍

陵糧芋栗

仲蔚徑蓬蒿雞

亦足勞香泥融燕寢

新盜

縹交魚雲霄羨

兼沼沚毛張儀徒事客鄣解

漫矜豪安得扶衰僮相鄰遂晦韜

逢

周芙蓉辭 有序

六磊周芙本細家息孔胥妻也孔素無鄉曲譽乙丑冬舟過塘上鄉人僞邀飲醉斂舟以民害愬於朝孔自度不免密書與妻畚尋仙遊庶絕軍配族黨難論之其妻覘得故神色不亂言笑如平常且備盛酒饌延親鄰是夕素服雉經死時年二十九孔聞之曰子伏誅梟木無遺憾矣園西媪張毛云

潢潦奔流合東南乖氣鍾憐生俱薄陋就死獨從容道殣懷金璧閨情采菲葑親鄰競嘉歎不復佐嘗饗

張貞哀辭

有序

予門生張敘女諱貞嫁海縣周曹以復入公門刺而瘐死先是貞在徙籍懼配軍投秦淮卒及周屍昇過其所貞湧浮水面神色踰五日夕不變認者曰此呂學諭甥張訓導女也殉夫藏聚寶坑舅姑能無念乎予哀之曰

堂上嚴君海縣儒素聞出嫁義從夫佳人命薄非今日那得將心報舅姑

梧溪集卷第七

梧溪詩集後序

梧溪詩集七卷江陰王原吉先生之所作也原吉幼從陳漢卿先生學詩漢卿與柯敬仲嘗同事虞伯生得其傳故爲詩春容而激切優柔而慷慨與有元盛時楊范諸公齊驅竝駕焉先生諱逢原吉其字也以祖母徐夫人手植雙梧於江陰橫河之上不忍忘因自號梧溪子世家江陰元季避兵徙松之青龍江復徙上海之烏涇而居焉元至正閒嘗獻河清頌於朝大臣薦之辭不受後張氏開闢姑蘇招賢禮士時士多爲之用先生獨高

蹈遠引不汙一命國初有以先生文學薦於上者召之甚急亦以老疾固辭噫先生之節槩如是其爲人可知矣子掖洪武初任通事司令轉翰林博士兼文華殿經筵事卒於官敕葬故壠掖子徠嘗以才德薦至京師未官而卒徠子輅宣德中以秀才舉授江西南康府照磨到任未幾以疾卒二子曰顏曰孟俱幼不能還遂僑居南康星子之東澗祖母黃母徐躬紡績以教二子今俱有成先生未歿而是集已梓行於世先生嘗自標題其微詞奧義及人名地里之難曉者於各詩之首其第七卷則

先生旣歿而掖之所刊也先生畫像楊鐵厓諸公皆爲之贊乙卯歲星子之僑居厄於回祿故與掖所授誥敕俱無存焉吁可惜也始輅來南康時畱是板於烏涇故居正統戊午顏歸省先壠始攜以來則板之失脫與字之昏剝者十有餘矣歲乙亥余來守南康聞之亟取視焉幸其家尚有原本乃命孟逐一酬對繕寫而命工重刊之以補其缺是集乃復得其全云顏孟皆恭謹好脩讀書知大義善事其母孟今爲社學師而顏遺其子龍入郡庠爲弟子員可謂能不墜其家學者矣景泰七年

歲在丙子秋七月之吉賜進士中順大夫南康府知府
錢塘陳敏政書

梧溪集後序終

梧溪集補遺

郊行卽事

枯茅三四椽黃土一兩堵中有白髮翁累累織麻屨將
謂營朝夕乃以輸官府昨日設公譙高堂陳鼎俎食前
方數丈吹笙擊鐘鼓里胥叩我門咆哮怒如虎賣屨典
春衣出銀二錢五我聞長太息垂頭不能語去去趣歸
來村村省編戶

白龍洞

廷甲按洞在江陰南外由里山
宋知軍范宗古建龍王堂于此

開元年中關輔旱靈岳神祠禱幾遍少監馮生能畫龍

明皇命試新池殿落筆蜿蜒勢未已素鬣冰鱗濕如洗
池波洶湧雷電驚雲氣之門白龍起吾觀馮豈作霖人
畫龍能雨疑有神深山大澤多窟穴不應杳眇不似真
澄江接海連空白宏深當是神龍宅螭虬狡獪非其倫
河伯江妃敢驅役霜鎖烟闕晝不開時傾膏雨蘇民災
一爐香火動誠意風馬雲車天際來吾聞澤國多水患
淮甸地乾多苦旱願均神力遍四方無令水旱常相半
西膠山雪晴寫呈無錫州尹遂蒙寵吳家渡築城
之役

一夜雪深二尺強石人墮指冰蠶僵猶喜金烏兩翅凍
不折天明飛出海上之扶桑老夫晨起膠山下風景看
來渾是畫連山萬頃玉爲田隔水數家銀作舍田中築
城圍義兵日高未飯飢腸鳴黃泥凍地硬如鐵白柄短
鋤鏘有聲不辭受寒餓但恐虧工程將軍踏雪來點名
萬夫鵠立顛且驚馬前壯士五色棒棒頭性命鴻毛輕
子生悔不習兵法雪夜擒吳書奏捷客欄抱膝漫悲歌
柰爾義兵寒若何

山中春晚

山中行跡少地迥落花多草長迷香澗松高掛女蘿林
深猿鳥下徑靜麋麋過春事今云暮其如懷抱何

送安上人歸馬跡山

插竹山中偶出遊折蘆濠上即歸休踞牀獅子聲方吼
鋸鐵龍駒跡間畱花雨六時紛似雪松風五月冷於秋
客來認得南泉斧七十二峰應點頭

右詩五首從邑城楊致樵家鈔本錄出筆意蒼渾

且於時事極有關係遺之殊為可惜亟補錄之致

樵名敦厚邑諸生嘉慶己卯恩科進士出庶常

改中書名景曾之本生父也年近八旬讀伊祖

宮傳文定公遺書尚手不釋卷原鈔詩六首內一首

已見卷四中外有長短句一首贊一首與梧溪子

手筆不甚合故闕而未錄非敢遺也

道光癸未秋八月邑後學雲樵葉廷甲識于靜觀

樓時年六十

困學齋雜錄

劉道原曰大江之南前代要服舜禹南巡崩不返葬禹
并不尊敬舜也啟非不孝於其父也時享在乎廟貌
魂氣則無所不之也秦漢而下崇在墓祭違經棄禮
遠事尸柩難以語乎理矣

李正方腹中有鱗甲諸葛亮謂腹中有鱗甲者但不犯
耳

許褚長八尺餘大十圍馬超問太祖曰公有虎侯者安
在軍中以褚有力如虎而癡故號虎癡是以超問虎

侯

任城翟慶之云在東平時口南王子淵一作淵從容問楊

叔能之詩於止軒先生先生曰叔能早年詩名籍甚

初八京時如空村謠甘羅廟諸作楊趙諸公極口推

許及自關中還所作澹不可讀大凡作詩作文但撒

手調腳便壞了

劉祭酒雲震以酒自晦常有東宮千秋節應教詩云一

年一度到青闈每到青闈盡醉歸絕勝杜陵驢背上

朝回日日典春衣又訪杜仲梁不遇云壯節文章今

老成而今何況白頭生牧之賦壘今勅敵甫也詩壇

舊主盟舌在儘從陵谷變氣高常壓海山平東湖花

草西湖月不管文園舊長卿游子明尹大興公為字

掾索詩即席賦浣溪沙粉署含香舊有名庖刀試手

便崢嶸并州人物未飄零父老共傳新政好兒童都

道長官清十分和氣滿春城春寒云東風連日暗塵

沙二月邊城草未芽燕子不來庭院悄定銜春色入

誰家公常游東平嚴彥祖饒東湖亭口請賦長短句

即席作太常引東湖亭下簇金鞍四座浹清歡人物

畫中看只枉了劉郎鬢斑花枝裊酒盃潑灩全不
放春閒絲竹舊東山暢好個風流謝安都城元夜念
奴嬌景龍天氣正餘寒料峭□□簾幙萬斛金蓮光
不夜香滿雲間樓閣金鐙頻敲繡簾高揭應爲黃昏
約霜娥無恙喚人依舊飄泊卻恨烏兔無情把人青
鬢白恁星星卻千古繁華行樂地誰笑誰歌誰酌北
海樽罍東山絲竹夢裏揚州鶴客窗無寐故人誰念
蕭索得薦不遇太常引眈眈九虎隔重關到天上卻
空還回首謝塵寰問今日誰人姓韓瓜田蔬圃竹溪

松徑何地不堪閒且莫問長安比蜀道元來更難跋
甯戚扣角圖老眼紛紛迷戰塵十年無路覓通津一
聲白石功名下輸與齊東扣角人

前宋士人山行於絕壁人跡不到處見有題詩者云鳴
梢疊葉響颼颼枕底寒聲爲客留野鶴不來山月墮
獨眠滋味五更秋少前遇髯人坐大石上意其爲詩
者欲前指忽不見余謂仙人亦有未能忘情者邪

陽羨驛舍壁上題漁家傲不知何人作
案能改齋漫錄
詞爲王家道輔
作
日月無根天不老浮生總被消磨了陌上紅塵常

擾擾昏復曉一場大夢誰驚一作先覺洛水東流山四

遶路傍幾個新華表見說在時官職好爭信道冷煙

寒雨埋荒草

輕諾似烈而寡信多易似能而無效進銳似精而去速

詞似當
作苛

似察而事煩許施似惠而無成面從似

忠而退違此似是而非者也亦有似非而是者大權

似姦而有功大智似愚而內明博愛似虛而實厚正

言似訐而情忠夫察似明非御情之反有似理訟其

實難別也非天下之至精其孰能得其實故聽言信

貌或失其真 情御反或失其賢賢否之察實在所

依是故觀其所依而似類之質可知也

詩人撒舉字彥舉陝人性嗜酒工於詩客京師十餘年

竟流落而死有詩集行於世今得逸詩數篇信手錄

之無題云誰家金鴨暖梅魂繡戶春風半掩門桃葉

等閒雷暮雨梨花寂寞過黃昏盤盤鸞髻堆雲影澹

澹蛾眉掃月痕常似謝家銀燭底鳳凰釵影落瑤尊

記夢云千里嶠函楚客行關河西上鐵牛城申湖亭

下月初上召伯堂前草自生十里杏園紅雨暗一條

春水碧羅平覺來半壁寒燈底吹落風簷暮雪聲過
 沙井云沙沈石馬廢城秋劔鉞寒生古戍樓平日只
 疑無蜀道此行何處問荊州山連海塞從西斷水界
 龍荒盡北流一曲商歌才夜半朔風吹雪滿牛頭遊
 香山云石棧天梯落日紅誰開青壁削芙蓉捫參歷
 井來何暮佩玉鳴鑾更不逢僧去古潭雲渡水鶴陰
 清露月平松世閒骨相誰潘閔誤打金陵半夜鐘潘閔
詩云頑童趁暖貪春睡忘卻登樓打曉鐘送郭祐之云南口青山北口雲
 天涯何地又逢君陌頭楊柳西行馬畫角三聲不忍

聞

中朝名士有以木菴陪飯竇太師陪鍼王狀元陪口作
 三陪圖徵詩當代名勝為一矧者鹿菴先生題云寺
 主善為無米粥病人要喫沒錢鍼皇都詩老多才思
 收拾寒酸入笑林或云始圖者太保公也
 沉漢先生趙復字仁復武昌之役始初渡江時寄皇甫
 庭云寄語江南皇甫庭此行無慮隔平生眼前漫有
 千行淚水自東流月自明又自遣詩云醉乘鸞馭到
 仙家彩筆雲箋賦落霞老去空山秋寂寞自鋤明月

種梅花人甚稱之

呂龍山與趙虎巖齊名平生多佳句夏日道中一絕句
曲盡田家夏日之趣棗花初落路塵香燕掠麻池乍
頽頽一片雲陰遮十頃賣瓜棚下午風涼

杭士王子慶收西域圖閣中令畫褚河南書丹青翰墨
信爲精絕意當時所畫甚多今止存四國前史皆逸
而不書今錄於此附國者蜀郡西北二千餘里卽漢
之西南夷也有嘉良夷卽其東部所居種姓自相率
領土俗與附國同言語少殊不相統一其人竝無姓

氏附國王子宜僧其國南北八百里東西千五百里
無城柵近川谷傍山險俗好復讎故壘石爲巢而居
以避其患其巢高至十丈每級丈餘以木隔之基方
三四步巢上方二三步狀似浮屠於下級開小門從
內上通夜必閉關以防盜賊國有二萬餘家號令自
王出嘉良夷政令繫之酋帥重者死輕罰牛人皆輕
捷便擊劔用矛漆皮爲甲弓長六尺以竹爲弦妻其
羣母及嫂兒弟死父兄亦納其妻好歌舞鼓簧吹長
笛有死者無服制置屍高牀之上沐浴衣服被以牟

甲覆以獸皮子孫不哭帶甲舞劍而呼之我父爲鬼
所取我欲報冤殺鬼其餘親戚哭三聲而止婦人哭
必以兩手掩面死家殺牛親屬以豬酒相遺共飲啖
而瘞之死後十年而大葬

鄭畋與盧攜爭高駢請公主下嫁南蠻事攜怒拂衣去
裾屨於研因抵之帝以大臣爭口語無以視百官乃
俱罷

兩浙都轉運使廉希貢中統初平章公之弟累官至正
議大夫余在運幕知公最詳公于閩人讀書略通大

義尤喜讀易爲人沈靜寡言樂善有守至元二十七
年七月末旬下血適其兄參政公以事來杭八月八
日疾革沐浴易衣冠而逝家人舉哀久之忽搖手止
哭者起坐謂其兄參政公曰吾與兄生同胞相離十
餘年今幸遇會於此謂必能承事顏色接杯酒之歡
數月而別豈期一病至此今將永訣兄能無一杯相
餞乎時久不飲酒參政公手斟酪漿一杯飲之且謂
曰吾父母去矣大兄去矣五弟六弟去矣吾二人年
各五十之上死不爲天勿以妻子之故亂汝身後汝

之妻子吾竭力以恤之汝去之後吾繼汝去矣公首肯又囑其弟端夫理問及其子可忠等勉以忠孝促令韉馬既告辭復臥而逝身後家無一錢行臺賻楮幣五十匹乃得歸中山

福州之俗冬至設醮以爲引新死者見其祖如古禮附廟

許公度說中統間左相安童嘗問魯齋釋老之說先生曰某未嘗讀其書不知其說又問張燿卿魯齋教人讀小學其說如何燿卿云某白幼時知童蒙如人學

便讀孝經此時小學未行於世小學乃是禮經摘出非全經不足學左丞張仲謙從旁對曰小學之書專載童子當爲之事若孝經曾子尚云參不敏何足以知之况童子乎又云魯齋欲興國學教國朝胄子可謂知本

閑閑宿三學士院對月詩云何年覲佛月天子各以寶華樓閣俱爲問上方銀世界不知有此夜寒無

馬德昌收米元章書及自寫真并贊云四明從事晉陵錢君世京字延叟過襄陽米芾曰昨送季濟明渡江

與汪行之復會蕭閒堂已撤幕壁閒有君像而題曰
權杭州觀察推官米元章像楊之儀筆楊之傑贊曰
君子之交小人之讎以人方人叔度宜儔余以袖掩
字而問行之曰誰歟行之曰君也僕爲檢同氣德友
識面三編無二君名姓嗚呼古人論世取友況同世
哉世復有三君子者觀文殿學士王公韶字子純樞
密直學士劉公庠字希道則僕竟不識其面選人蔡
君肇字天啟於相知閒語僕若素心腹者云得僕於
王荆公蓋僕於元豐六年赴希道金陵從事之時會

少謫不赴始識荆公於鍾山聞公門有數後進喜爭
名而相非又託以長者之言也如天啟樂道人善者
一人而已僕老矣不知一蔡二楊行能識面乎因延
叟之語發歎并記其事於家集中以貽子孫嗚呼仕
開速進之路則世人之邪說大行紛紛不求己之非
人豈其本心實利之誘然今樂善君子一何多邪彼
口不道忠信捷捷而惡人翩翩而自喜默默懷姦藏
慝竊竊掩人之善咕咕自標置有得不少悛乎旣序
其事因系以詩誰規蕭閒堂圖贊凡醜質昧昧起我

思有懷斯士吉吾生終不逢二陵已相失苟養走四方公卿更絕跡向老交漸稀背憎十六七豐吾九畹蘭任汝滿地棘我豈蕭閒人偶然得空壁美哉何方彥精驅入妙筆君不愧顧長康取媚桓溫圖九錫我不愧孟浩然緩策京山遇摩詰前此交道久不康紛紛白頭多不卒嗚呼紛紛白頭多不卒回首此君應辟易

山谷與秦少章書云比在告熟讀所惠詩卷如公闢祭文語氣詩句極有風裁可喜合處便似吾少游語然

恨在遣詞病在骨氣耳古之間道者請問治天下則對曰去汝鄙人也何問之不豫也文章雖未學要須茂其根本深其淵源以身爲度以聲爲律不加開鑿之功而自寵深矣公誠以此言爲可猶有一物爲公道之二十年來學士大夫有功於翰墨者爲不少求其卓爾名家者則未多蓋嘗深求其故病在欲速成爾夫四時之運天德也不能卽春而爲冬斷可識矣承自屈訪逮故及此更占之大方之家有所聞見幸

見教

此帖語在刀筆

蘇滄浪帖云草書把筆離紙三寸取其紙寬掌平虛腕法圓轉則飄縱之體自絕出耳

米帖朱雀橋南萬井煙輪蹄不放草芊芊天街惟有新楊柳雨色春容占一年唐中書舍人杜牧之能作此語宋中書舍人薛道祖能作此語清漣老令不勝降歎遞中得書筆當付便分非遞可附九月與鼇同到

耳

里村一麥四穗兩歧不可勝數豐年上瑞自人和土
羊似湧波海角嘉牟猶四穗萬方和氣不勝多

卽事人和訟簡契疎懷疆理文漪世少偕龍吼惠風
傳玉壘露灑寶月乞銀淮婁公勝相崇三果袁守靈
丹健百骸夏木陰森三十畝夢回午蔭罩山齋

祕書郎喬仲山云至元十年自以東曹掾出使延安道
出鄜州土人傳有杜少陵骨在石中者因往觀之石
出州市色青質堅樹於道傍中有人骨一具趺坐若
生而成者與石俱化以佩刀削之真人骨也

士大夫家收得呂忠穆公頤浩訓姪帖云子自寒苦起
家平生仕宦赴公盡瘁不敢辭難致仕將相姪擢因

祖先積慶得此一命須爲門戶爲孀母二幼自重守
官如後

一勤廉爲仕宦勤則上位必見喜廉則吏人自是
差服

一自監司知通極恭與同官極和

一慎言語不可輕發一談

一寡戲笑不可容易玩狎

一勿飲酒

一不可令市買在務未經稅之物

一其他一一畏慎

紹興三年正月初五日上押付擢

子貢好廢舉與時轉貨劉氏注云廢謂物貴而賣之舉
謂物賤而買之與時謂逐時轉貨謂轉貴收賤也

越人王修竹所藏雪竇禪師真跡詩云有無盡是兩頭
語諸祖因茲不立言末代兒孫列戶牖一花五葉失
其傳永嘉雖問曹溪路畢竟惟明自己禪根器警敏
誠難遇鑿透高原始及泉末用封字印是曾入賈秋
壑家有韓宗古敏甫時邦美朱伯原吳邦獻王元直

周仁熟鄧子常白蒙亨章致平王子助霍靜之紹聖
四年跋張浮休偈云雪竇傍邊又生一孔北邙山下
千家萬家兔角龜毛竟將何用子細尋思不如珍重
米元章云一幅昏昏半已空何人重出自爲工從茲
萬偈并千頌擾亂春風卒未窮

江浙行省掾高仲器收白芍藥一軸景祐元年十月七
日高平范仲淹題詩其上云桐廬方正父家藏唐翰
林畫白芍藥子來領郡事因獲一見感歎久之而題
二十八字治亂興衰甚可嗟徒憐水調素榮華開元

盛事今何在尚有霓裳寄此花

楊叔能事言補詞氣不甚平和爭辨譏罵居多今錄數
事於此

人不讀儒書以變化之無良師友以教益輔成之雖年
至七十亦無異於十五六之時也但髮白面皺耳
密州趙德正云泰山如坐嵩山如臥華山如立
火葬天下之至慘也人子不學違聖人之訓爲時世所
移懵然爲之父母何罪歿而遭大戮嗚呼冤哉嗚呼
痛哉

老氏釋氏吾有取乎曰有老氏吾取其佳兵不祥釋氏吾取其戒殺

京兆分司劉御史請予作竇壁詩云誰言河水濁鳴鏑約秦境官軍開如蟻城守申嚴警竇壁一匹夫欲汲困短綆慷慨願自効行臺可其請從徒二十八設伏獨園靜邏騎百蹄翻倏來落電影勇士貴一決猶豫失馬猛賞功不踰日簫鼓喧市井英風激衰輓胡以倍淒冷

平生交遊贈余詩者多矣惟鐺京叔二篇嘗吟咏之憶

昔逢君北渚秋藕花香裏醉輕舟三年一別空回首千里相思更倚樓明月不隨春物老碧山長帶暮雲愁天平松竹黃華水早晚柴車得共遊思君一日如三載兩寄詩來慰我心塵土愈知人世隱風煙遙見海門深貧來笑我常癡坐亂後憐君更苦吟歷下亭前春水闊扁舟何日重相尋
素菴以六忍寧心澄慮消禍致福一曰忍觸二曰忍辱三曰忍惡四曰忍怒五曰忍忽六曰忍言

飲食以三十口為平過則為多不及為將病

此不知出處當考

古甲子

十干

闕逢甲

旃蒙乙

柔兆丙

彊圉丁

著雍戊

屠維己

上章庚

重光辛

玄默壬

昭陽癸

十二支

困敦子

赤奮若丑

攝提格寅

單闕卯

執徐辰

大荒落巳

敦牂午

協洽未

涒灘申

作噩酉

闍茂戌

大淵獻亥

廉端父理問漢鏡銘云田氏作鏡世未有位三公考

潘轉菴題釣臺詩云蟬冠未必似羊裘出處當時已熟

籌但得諸公依日月不妨老子卧林邱英雄陳跡千

年在香火空山萬木秋絕笑黃塵吹鬢客愛來祠下

繫扁舟

日休八識

眼耳鼻舌身意未那識第八識

詩云兄弟八個一個癡其中

一個最蹺蹊五個向外能經紀止畱一個看家計第八

識浩浩三藏不可窮淵深七浪景為風愛口特種根

身立去後先來作主翁不動地邊才捨藏金剛道後

畢然空大圓鏡智成無漏普照十方塵刹中

地水火風聚一區之假合生住異滅成四像之遷移三緣和合而緣生為身為體五蘊滅謝而入死惟識准

神

五不男天健如變半

五不女螺紋鼓角線

前淮浙發運司主管文字趙汝諫送姪堦張師道赴召詩五絕句中云翔鸞威鳳兩同飛此日閩山是獨歸聞說京塵迷望眼後來誰為洗征衣有一士慕佳人亦有詩云君王自愛相如賦左右安知即墨賢此語

太逼人劉雲震祭酒題明皇擊梧圖云宮殿蕭森蔭碧梧杖頭白雨趁花奴還畱飛下漁陽鼓一曲霓裳救得無

中原士夫出處

定齋先生李獻卿字欽止河東人

陳司諫規字正叔稷山人明昌五年進士博學能文詩亦有律度為人敦厚動有禮節南渡以後諫官稱許古陳規而正叔不以訐直自名仕至右司諫卒官子良臣今在燕中

吏部高先生鳴字雄飛岢嵐人歷彰德路總管召爲翰林學士至元五年至御史遷吏部尚書終於官

淄川先生楊弘道字叔能自號素菴默翁博學無所不知而不爲科舉計嘗以蔭仕於金遭亂南歸爲唐州司戶北還終於鄉里有小亭集十卷事言補一卷行於世參政楊公諱果字正卿號西菴中山人金末王鶚榜登科歷偃師蒲城縣辟陝州行臺郎中北渡後復居洛陽紫陽爲課稅所官辟經歷官參河南經略司事中華元統改元召爲參知政事告老除懷孟路總管以榮其

歸致仕後葬於鄉里

轉運田時秀字彥實易縣人大定十九年進士仕至太原轉運使喜作詩爲周德卿李之純賞識感興云散木不材寧適用虛舟無意任乘流百年身世槐安國千古人情羨頡侯賦古塔云締構百年人換世消沈千古鳥盤空他類此彥實所居里名半十行第五以五月五日生小字五兒二十五歲鄉府省御四試皆中第五年五十五八月十五日卒造物之戲人如此

如五月五日生者見其賦集考

太常卿石抹世勣字晉卿承安中進士終於禮部尚書
子嵩字企隆應奉翰林文字父子皆死蔡州之難
張戶部德直字伯直平陽人叔祖邦彥字彥才張口榜
登科以口川令致仕有松堂集父迪祿字仲英明昌
初進士歷岐山上黨二縣令卒於省掾伯直貞祐三
年進士釋褐新平簿辟藍田令秩滿父老詣行臺畱
再任去之日爲立生祠移沔池通許召補省掾選授
警巡院使終於同知武勝軍節度使事子城今居永
寧

張介字介夫彭城人正大元年經義第一人歷鞏鼓

二縣令幼有賦聲爲人有蘊藉嘗贈詩人楊叔能未

章云我貧自救如沃焦君來過我亦何聊爲君欲寫

貧士歎才思殊減荒村謠

楊初以荒村謠得名故云

撒舉字彥舉陝人性嗜酒工於詩客京師十餘年竟流

落以死同時有鄭雲表者慕彥舉之爲人作詩挽之

云形如槁木因詩苦眉鎖蒼山得酒開人以為寫真

云

道士申志貞字正之太原人嘗爲道教提點住京師長

春宮時道士舊傳十七人坐與釋教持論不勝落髮
爲僧者志貞其一也後終於鄉里

寂通老人陳時可字秀玉燕人金翰林學士仕國朝爲
燕京路課稅所官

紫邏几几道人楊鴻字飛卿一名雲鵬少梁人北渡終
於東平有洞然集行於世

虎巖先生趙著燕人終於編修官

南湖散人曹居一字通甫又號聽翁太原人金末登進
士第仕國朝爲行臺員外郎

新軒先生張伯道字聖俞

紫陽先生楊奐字煥卿又名知章奉天人以明經後進
稱爲關西先生少年時自悟以前身爲紫陽宮道士
因自號國朝爲河南府課稅所官有還山集行於世
廉菴題趙輔之樊川圖云一賦阿房萬古傳豈知今有
趙樊川謝公墩上王公住異代風流各自賢

高雄飛獨石詩云一塊蒼頑石頽然半水濱可憐閣立
本徒寫五湖真題杜莘老華山圖上方可望不可到
今日興來時臥遊須信丹青有神化世閒隨處是同

州

內朝鹿莽先生王盤字文炳初名采齡字蕭客東平人
 學於徵君麻九疇金末以易經登科北渡後為永平
 學官一時名士皆出其門中統初召為真定宣撫使
 入拜翰林學士承旨年八十餘致仕歸東平東宮命
 朝士祖餞仍給半俸時人榮之今近九十尚無恙
 仁甫趙先生復初被虜時有寄皇甫庭詩寄語江南皇
 甫庭此行無慮隔平生眼前漫有千行淚水自東流
 月自明又詩乘雲曾到玉皇家彩筆雲牋賦落霞老

去空山春寂寞自鋤明月種梅花

庸齋先生薛玄字微之華陰人仕至河南府提學有易
 解行於世

右中原名公翰墨至元乙酉得於京師庚寅裝於
 錢唐直以所得日月先後次序之不敢妄有品第

京師名琴

耶律丞相春雷 金內府物名曰承華殿春雷

玉振 雷珏重修 不出戶

石上流泉 寒玉

宋少監毅夫寒玉 吳興沈僚斲張鉞重修

焦仲良秋嘯 雷氏今歸天上

李子亨冠古韻磬 李陽冰篆

雲和 李勉斲今歸天上

薛道錄金磬 張鉞

鄭太醫 雷霄斲今在行臺太丞家

高彥敬金儒鳴玉

王安仁實腹琴

商左山寒字號 趙耶利斲

喬仲山家冰清 開成元年西蜀郭諒崇寧四年
馬希先奉聖旨重修 八清

陳也里參政黃龍至寶 百衲
吳越國王官百衲雷威
斲朱漆書槽腹黑漆

張詹事子友家 張越琴

李士彥三足琴

濟南姜、惠甫家列子琴 雷氏斲

南京劉介甫家三峽流泉 唐天寶年雷威斲外刻流泉
內刻三峽流泉款皆篆書

廉廷臣玉澗鳴泉 唐雷氏貞

廉端父瓊響 慶歷年道士衛中正斲
崇寧年馬希先重修 秋籟 同上

郭佑之御史霜鐘 前宋僧斲

游平章子明家張鉞孫枝

王郎中聲滿天地 南方物

李德新天寶雷會

郭北山新製萬壑松 無款或來自中原製度在雷口口五代閒錢鏐家物

夏信之雷威琴 唐懿宗時斲款云咸通四年秋八月處士雷威斲

馬德昌洞泉 雷氏嵩陽野叟修磬編

張可與號鐘 南方物臣馬希先奉聖旨重修

古器

行臺右丞李公家

世母辛卣 山敦 牛敦 周盤 夔卣

祕書郎喬仲山家

文王鼎 正考父作文王 周鳳盃 周粟紋壺

王子慶家

商鼎 漢方壺 漢山龍壺

敝家

商父乙鼎銘曰子父己

商州師卣銘曰州師錫朋具用作父丁尊舉冊

商父辛彝銘曰父辛

周伯吉父槃銘一百三十字行臺李順甫鬻於市家人折其足用為餅爐余見之

乃以歸子

周鄧○鼎蓋銘十八字

漢鏡二一尚方一八花透光

董頑石家

商百乳夔

商山尊銘

商舉鼎銘曰夙

商鼎銘師

商觚

周壘

吳和之家

商右伯盃

商饗餐鼎銘象形一字

周草窗家

商鳧尊

銅馬

羅和齋

周鳳尊銘一字眾

周日乳夔

商貫耳壺銘字作鳥形首有冠

楊中齋駙馬

周方鼎

周細文大羊鼎

周觚稜壺

舊藏余家

商小鼎一

劉耀卿

商竿

商子孫盃

商蛟篆壺銘一字

商敦

周司空甌

漢方壺 周大盃

閑邪先生

敦二

方圓二器未見

李又有李陽冰捫三墳記字三寸許大字三百有畸宣和題籤復有墨本亦徽宗題冊子又有李成樊川捕魚圖長三丈徽宗御題

書畫見聞

東坡云永禪師欲存王氏典型以為百家書祖故舉川舊法非不能出新意求變態也然其意已逸於繩墨之外矣 下歐虞恐非至論若復疑其臨倣又下此論下矣

濟南楊淀周家藏閣中令畫鎖竇建德圖褚河南書傳

張仲悅家藏謝尚餘寒帖 古完本瘞鶴銘

冀州趙弘道家藏高宗御題淳化帖

濟南張可與家

顏魯公頓首夫人帖 唐樵右軍大周硬等帖 許渾

烏絲闌今體詩 五帖 懷素猛吟 余家物 僧弘元春集

右軍書越州寺碑 歐陽詢卜商等帖 韓文公書

名告 魯公書名告 元微之和樂天雪韻 韓渥

尺牘一卷山谷跋 唐樵義之罔極三帖 吳生妙

勝如來 惠崇巨軸 小景 巨然山水 李伯時陽關

圖 元章自寫真 皇象急就章甚佳當是第一本

切記

霍治書清臣家

李北海縉雲帖 柳書李氏墓記 唐文皇手詔好謙

帖 蕭子良變體詩 唐人臨 魯公鹿脯帖 孫過

庭千文 唐人樵蘭亭 內府善本 伯時孝經 著

色郭熙二小幅 巨然山水橫披 伯時拂林天馬

唐人仙山故實 周昉臨六朝人天官 韓幹圍

人調馬圖 邊鸞木瓜花

喬仲山家

顏太師馬病帖 智永千文 宣和內府 高閑千文 余家

物趙明誠家物 張旭承告帖 宣和 僧夢閑白蓮

詩 宣和 張長史帖章草王粲評詩 宣和南唐 智

永筆力帖懷素臨 東坡書太白詩 東坡小楷金

剛經全用鍾法 巨然秋江晚渡明昌 李思訓江

山漁樂南唐明昌 陸瑾溪山風雨明昌 郭忠恕

飛仙故實宣和 樗軒題 董元寒林明昌內合同

貫休大阿羅漢明昌 伯時女孝經明昌 衛賢

高士圖宣和 郭熙松石二大幅 李成重巒秋晚

吳侏蕭翼賺蘭亭圖宣和 張符牧牛圖明昌宣和

東閣 張萱鼓琴仕女圖明昌宣和 尉遲乙僧有

餘菩薩南麓跋 巨然歲寒圖 崔白讀碑 董元

煙嵐重溪 王齊翰行佛圖王詵寶繪 太原珍玩

王齊翰觀音像上同 王維維摩示疾圖宣和明昌

韓滉乳牛睿思東閣 黃華雪山寫照 胡瓌番

部卓歇大觀宣和睿思明昌

喬仲山云在都下時口賣人處有右軍書東方畫讚爛

處歐陽政宣收附豈元章書史中所載者耶又鄭廣

文溪橋峻嶺圖唐張藻松石微流圖高宗題簽 李伯

時陶宏景像高宗題 李唐晉文公復國圖筆意奇古

雖近代人實有古人之風行書亦佳傅古戲水龍高宗

鍾案戲藻魚 高宗 唐朱繇文殊像奇古唐人大悲像

元彥禮 大年墨雁 范寬雪峰蕭寺 宋迪遠浦歸

帆王維秋山蕭寺

司德用

邊鸞孔雀 易元吉獐 崔白荷花鴨子 董元雪景

二幅 董元廬山圖 閔令職貢獅子圖 胡瓌啖

鷹圖 喬仲山云虔筆也 王詵長江遠岫 韋偃松

張希顏四時寫生 盧稜伽羅漢 李成松石平遠

關全大幅山水 韓滉歸牧圖 韓滉醉道士圖

郭熙山水二幅 湯子昇鑄鏡圖 吳道元火德

真君 徐熙紅躑躅 郭處輝林雀 世宗羣鹿

世宗馬 黃荃竹鴿圖 王端人物

郭北山御史

唐樵右軍重告等六帖 右軍快雪時晴帖 右軍承

告帖 唐摹王宏帖 王氏寶章集中物 唐樵蘭亭詩

序 徐會稽寶林寺詩 楊景度永興詩帖 歐陽

率更道夫帖 右軍七月五日青絹帖 胡季良臨

右軍郗家信帖 右軍送黎帖 陶宏景屈畫帖

陳閔寫御廐馬

宣和收附

孫過庭千文

定武五字

不損本蘭亭敘

楊景度十九郎帖

嵇叔夜聽雨

帖 魯公江外帖

陸東之蘭亭詩

唐人節史

歐陽詢稽古稿

高閑九原帖

白居易行元微之

告 陶貞白書丹經

李邕口味帖

康告 東坡

致語稿

山谷老將行

山谷襍穢帖

唐撫右軍

瞻近帖

晉王珣伯遠帖

呂洞賓自寫真

李成

二大幅

烈女箴

吳生坐神

文竹 未見

米元

暉楚山清曉

韓滉堯民擊壤

續見

東坡黃素上清儲祥宮碑

右軍此事帖白麻紙上行

草後一行然欲不可長非筆非臨前人直以為真跡

殆非過許上古印甚多莫可辯一四寸許大印翦去

八分略見御字口如此宣和明昌兩朝小璽及用羣

玉中祕印秋壑悅生及封字印徽宗御筆瘦金書簽

奇物

王子慶

右軍裹鮓帖

畢瑊手狀

柳經

西域圖

伯時五

馬圖 關仝早行圖 李成看碑圖 顧愷之初平起石爲羊

吳門季宗元

魯公馬病帖 未見

謝安八月五日帖 楊景度珊瑚

帖 吳通微告 唐人文殊像 又七居胝佛 唐大悲像

此書於弘治十五年龍集壬戌五月望日在竹莊陸宗美先生第會飲約齋俞寬甫帶於彼假歸錄得之但不曉困學齋何人也當伺識者再行請問

而知略識得之之歲月焉是日錄完故識 東陽

無垢道人純謹識

嘉靖戊申五月旣望汝南袁表命工徐堂錄於陶齋

漁陽鮮于樞字伯幾所居有困學齋工行草書聲價等趙文敏詩傳於世元音體要中多載之此非難知者足徵前輩之樸率也

康熙壬戌五月樵李倦叟曹溶記

乾隆癸巳從書局借瓶花齋鈔本影寫其中脫悞

甚多俟覓善本訂正之七月朔分鈔書局識

丁酉十月朔吳門陸貫夫先生以所藏明人舊鈔本輟贈蕭閒無事取舊時錄本校讐一過改定凡數十字初十日知不足齋書

嘉慶甲子五月霖雨兼旬嘉湖兩郡幾成澤國寓晉齋書種堂欲歸不得愁坐無聊相與反覆研究校出譌誤十餘字以消悶懷遺積慮耳廿五日大雨中識

